



Sarajevo, 20.10.2022. godine

MEDIJIMA

SAOPĆENJE ZA MEDIJE

Održan šesti sastanak Pododbora za inovacije, informacijsko društvo i socijalnu politiku

Šesti sastanak Pododbora za inovacije, informacijsko društvo i socijalnu politiku između Evropske unije i Bosne i Hercegovine održan je 20. oktobra 2022. godine, putem video-konferencije. Sastankom je u ime Bosne i Hercegovine kopredsjedavao pomoćnik ministrice u Ministarstvu civilnih poslova BiH Adnan Husić, a u ime Evropske komisije Mary Teresa Moran iz Opće uprave za politiku proširenja i pregovore o pristupanju (DG NEAR).

Predstavnici EU i BiH su razmijenili informacije koje se odnose na oblast informacijskog društva i komunikacijskih tehnologija, provedbu Digitalne agende za Zapadni Balkan, modernizaciju javne uprave, korištenje e-usluga i kibernetičku sigurnost.

Evropska komisija je pozvala vlasti u BiH da usvoje zakonske propise o elektronskim komunikacijama i elektronskim medijima, uključujući odredbe o transparentnosti vlasništva nad medijima i oglašavanju, te ubrzaju uvođenje broja 112 za hitne slučajeve u cijeloj državi. Preporuka Komisije je, također, da se osigura finansijska nezavisnost Regulatorne agencije za komunikacije, kao i finansijska održivost i politička neutralnost javnih RTV emitera u BiH.

Usvajanje državne strategije zapošljavanja ostaje jedan od prioriteta, kao i projekat Garancije za mlade i jačanje mehanizma koordinacije u vezi politika zapošljavanja. Evropska komisija je pohvalila usvajanje akcionih planova za inkluziju Roma.

Komisija je pozdravila poboljšanje u procesu prikupljanju podataka za sve obrazovne institucije, ali i izrazila žaljenje jer BiH nije osigurala učešće u međunarodnim testiranjima PISA i TALIS te preporučila nastavak učešća u testovima TIMMS i ICILS.

Od bh. vlasti se očekuje da izradi novu strategiju za naučni razvoj i akcioni plan za period 2023-2028.

Na sastanku se razgovaralo i o prioritetima u području kulture, učešću u programu Kreativna Evropa i rješavanju pravnog statusa i finansiranja sedam kulturnih institucija od značaja za BiH.

Direkcija za evropske integracije

